

Ibu kecewa, tadika ikat tangan, mulut anak supaya tidur

PULAU PINANG 12 Ogos - Terkejut, berang dan kecewa.

Itulah perasaan seorang ibu berusia 35 tahun sebaik sahaja mengetahui anak sulung yang diantar ke sebuah tadika di negeri itu diperlakukan seperti seorang penjenayah semata-mata bagi memastikan kanak-kanak berusia tiga tahun itu tidur.

Ibu berkenaan, Meoy Sook Yeng berkata, tindakan melampau pengurusan tadika terbabit amat dikesali memandangkan ia memberi kesan terhadap perkembangan anak lelaki, Walden Lian yang kini mengalami kesukaran untuk tidur.

Katanya, seorang pengasuh di tadika terbabit mengikat tangan menggunakan kain sarung bantal peluk dan melekatkan pita pelekat di mulut anaknya bagi memastikan kanak-kanak terbabit tidur.

"Kejadian ini berlaku sekitar April dan Mei lalu dan sebaik sahaja mendapat tahu perkara ini, saya dan suami berjumpa pengurusan tadika terbabit bagi mendapatkan kepastian.

"Dalam pertemuan dengan pengetua tadika terbabit, pihak tadika memohon maaf dan mengaku pengasuh terlibat sememangnya mengikat tangan anak saya dengan sarung bantal.

"Namun, selepas pertemuan itu, perkara ini berulang apabila anak saya mula mengadu yang mulutnya ditampal dengan pita pelekat semata-mata untuk memaksanya tidur," katanya kepada pemberita di sini hari ini.

Tambah Sook Yeng, dia dan suami tidak percaya pengurusan tadika berkenaan membiarkan perkara seumpama itu terjadi kerana ia memberi kesan yang besar terhadap perkembangan kanak-kanak.



MOEY Sook Yeng melakonkan semula bagaimana tangan anaknya diikat dan mulut ditampal dengan plaster di Pulau Pinang, semalam.

"Ekoran kejadian ini, anak saya kini trauma apabila hendak ditidurkan dan sering menyebut nama pengasuh terbabit dan menangis ketakutan.

"Luluh dan sedih hati saya atas apa yang terjadi kepada Walden kerana dia seolah-olah didera secara fizikal dan mental oleh pengasuh terlibat," ujamnya.

Menurutnya, bagi mengelak kejadian itu terus berulang, dia dan suami mengambil tindakan menukarkan anaknya ke tadika lain dan membuat laporan polis pada 2 Jun lalu agar siasatan lanjut dapat dijalankan ke atas tadika berkenaan.

Sementara itu, jurucakap Jabatan Kebajikan Masyarakat (JKM) negeri yang dihubungi berkata, pihaknya akan menyiasat dakwaan berkenaan dan sekiranya benar, tindakan tegas akan diambil.